

आकाशवाणी

खबरां -----

1. प्रधानमंत्री नरेंद्र मोदी होरें अमरनाथजात्तरा गी मुल्लवै दी आध्यात्मिक परम्परा ते सांस्कृतिक एकता दा पवित्तर आध्याय दस्सेआ, उनें श्रद्धालुएं गी शुभकामनां बी दित्तियां।
2. वित्त मंत्री निर्मला सीतारमण होरें फ्रांस दे निवेशकें गी विकसित भारत 2047 च भारत दी जात्तरा च भागीदार बनाने लेई साद्दा दित्ता, भारत-फ्रांस रणनीतिक सांझेदारी गी मजबूत करने दा आह्वान कीता।
3. अज्ज पच्छिम बंगाल च विधानसभा च नमें चुने गेदे विधायकें आस्तै 2 दिनें दा सिखलाई कार्यक्रम शुरू कीता गेआ।
4. भारत नै आप्रेशन अमिस्ताद दे तैहत भूंचाल कन्नै प्रभावित वेनेजुएला आस्तै मदाद बधाई, तकरीबन 260 लोकें दी मौत ते ज्हारां लोक अजें बी लापता।
5. भारती मौसम विभाग नै कल तगर गुजरात, गोवा, महाराष्ट्र दे बश्कारले इलाकें, उडीसा ते मध्य प्रदेश दे किश हिस्सें च भारी बरखा दा रेड अलर्ट जारी कीता ऐ।
6. फीफा विश्व कप च स्विटजरलैंड नै अल्जीरिया गी 2-0 कन्नै हराइयै वैंकुवर च राउंड आफ 16 च प्रवेश कीता।

<><><><><><>

PM Amarnath Yatra

प्रधानमंत्री नरेन्द्र मोदी होरें श्री अमरनाथ जी दी यात्रा करने आहलें श्रद्धालुएं गी शुभकामनां दितियां न। इक चिट्ठी च प्रधानमंत्री होरें सालाना इस यात्रा गी मुख्य दी आध्यात्मिक परम्परा ते सांस्कृतिक एकता च इक सनातन ध्याऽ दस्सेआ। उंनं आखेआ जे बाबा बर्फानी दे दिव्य दर्शन लक्खां बद्धे श्रद्धालुएं दे जीवन च इक नई भुलने आहला ते बड़ा गै शुभ अनुभव ऐ। प्रधानमंत्री होरें श्रद्धालुएं थमां 5 संकल्प लैने दा आग्रह कीता जेदे च “Vocal for Local” “एक पेड़ मां के नांऽ” “राश्ट्र पैहले” आहली भावना गी अगगे बदाना शामिल ऐ। प्रधानमंत्री नरेन्द्र मोदी होरें अमरनाथ जात्तरा गी मुख्य दी आध्यात्मिक परम्परा ते सांस्कृतिक एकता दा पवित्तर आध्याय दस्सेआ।



Amarnath-Darshan

सालाना श्री अमरनाथ जी दी जात्तरा दे पैहले ध्याड़े अज्ज दपैहरी 3 बजे धोड़ी कुल 6 ज्हार 280 श्रद्धालुएं श्री अमरनाथ जी दी पवित्तर गुफा दे दर्शन कीते। अधिकारियें दस्सेआ जे सख्त सुरक्षा बंदोबस्ते हेठ ज्हारां बद्धे श्रद्धालुएं पहलगाम ते बालटाल दौनें रस्ते जात्तरा दी शुरूआत कीती ही ते बदलदे मौसमी हालात दे बावजूद पवित्तर गुफा च मत्था टेकेआ ते प्रार्थना कीती। एह तीर्थ जात्तरा प्रशासन ते सुरक्षाबलें आसेआ कीते गेदे सख्त सुरक्षा बंदोबस्ते हेठ तोड़ चाढ़ी जा'रदी ऐ।



Yatra Med. Facility

अमरनाथ जात्तरा पर जा'रदे श्रद्धालुएं दी भलाई-बेहतरी यकीनी बनाने लेई उधमपुर सेहत मैहकमे आसेआ जम्मू-श्रीनगर राश्ट्री जरनैली शिड़कें पर टिक्करी थमां चनैनी नाशरी सुरंग तगर जात्तरा आहले रस्ते पर 6 मेडिकल टीमां (एम्बुलेंस) सने तैनात कीतिआं गेइयां न। एह एम्बुलेंसां महत्वपूर्ण थाहें पर

तैनात होडन ते बक्ख-बक्ख मेडिकल सरबन्धी कुसै बी चाल्ली दी आपदा आली स्थिति कन्नै निब्वड़ने लेई अमले ते समेयान कन्नै लैस होडन। एह्दे अलावा श्रद्धालुएं दी भलाई-बेहतरी गी ध्यानै च रखदे होई 51 शा मते हेल्थवर्कर ते 2 सुपरवाइजरें गी तैनात कीता गेआ ऐ। इस पैहलकदमी दा मकसद आपदा आली स्थिति दरान श्रद्धालुएं गी फौरीतौरा पर मेडिकल सहायता उपलब्ध करोआना ऐ।

<><><><><><>

Tawi-Boating

इस्सलै जारी श्री अमरनाथ जी जात्तरा दरान कीते जा'रदे बशेष इंतजामें दे इक हिस्से दे तौरा पर अज्ज जम्मू च तवी रिवर फ्रंट पर किश्ती आली सैर दा उद्घाटन कीता गेआ। एह उद्घाटन जम्मू स्मार्ट सिटी दे मुख्ब कार्जकारी अधिकारी ते जम्मू नगर निगम दे कमिशनर डा. देवांश यादव होरें कीता। इस पैहलकदमी दा मकसद अमरनाथ जात्तरा दरान जम्मू औने आहले श्रद्धालुएं ते सैलानियें गी इक सुखद मनोरंजन उपलब्ध करोआना ऐ। मेद ऐ जे किश्ति सैरगाह दी सुविधा कन्नै तवी रीवर फ्रंट पर आकर्षण दे कन्नोकन्नी सैलानी बी इस रीवर फ्रंट दा अनुभव करने दा मौका थ्होग।

<><><><><><>

FM-Ind. France

वित्त मंत्री निर्मला सीतारमण होरें आखेआ जे भारत-फ्रांस रणनीतिक सांझेदारी, लचीले ते नवाचार आधारित विकास दे अगले चरण गी अगगे बधाने लेई पूरी चाल्ली तैयार ऐ। पैरिस च भारत-फ्रांस बपार राउंडटेबल गी संबोधित करदे होई उनें आखेआ जे तकनीकी प्रगत्ति, आपूर्ति श्रृंखला विविधीकरण, उर्जा परिवर्तन ते भू राजनीतिक विकास दे कारण वैश्विक अर्थ बवस्था तेजिया कन्नै बदलाव दे दौर थमां गुजरा रदी ऐ। वित्त मंत्री होरें होरें फ्रांस बवसाएं ते निवेशकें गी विकसित भारत 2047 दी दिशा च भारत दी जात्तरा च भागीदार बनने लेई साह्वा दित्ता।

<><><><><><>

West Asia

कोलकाता दे न्यू टाउन कन्वेंशन सेंटर च पच्छिम बंगाल च नमें चुने गेदे विधायकें लेई दो दिनें दा सिखलाई आला प्रोग्राम करोआया गेआ जेदा उद्घाटन लोकसभा दे अध्यक्ष ओम बिरला होरें कीता। उद्घाटन समारोह च ओम बिरला होरें गी गार्ड आफ आनर भेंट कीता गेआ। इस समारोह च पच्छिम बंगाल दे मुख्यमंत्री सुबेंधु अधिकारी संसदीय मामलें दे मंत्री किरण रिजिजू समेत होर प्रतिनिधि बी शामिल हे। इस उद्घाटन समारोह दा संबोधन करदे होई लोकसभा अध्यक्ष ओम बिरला होरें आखेआ जे विद्यार्थी प्रक्रिया दे कन्नोकन्नी, विधायकें गी नमीं टेक्नोलॉजी, नवाचार, ए.आई ते डिजिटल टेक्नोलॉजी बारै बी पता होना लोडचदा।

<><><><><><>

Op Amistad

भारत नै आप्रेशन अमिस्ताद दे तैहत भूंचाल कन्नै प्रभावित वेनेजुएला लेई अपनी मदाद बधाई दिती ऐ। सोशल मीडिया पर चला'रदे चिकित्सा राहत कारणें दी फोटोआं सांझा करदे होई विदेश मंत्रालय नै दस्सेआ ऐ जे सेना दे फील्ड अस्पताल, वेनेजुएला च प्रभावित समुदाएं गी चिकित्सा दिक्खभाल प्रदान कीती जा'रदी ऐ। वेनेजुएला दे भारती दूतावास दा आखना ऐ जे दक्खन अमरीका राष्ट्र च भारत दे नई राहत प्रयासें गी व्यवसायिकता ते सेवा दी गुणवत्ता आस्तै जनता थमां सराहना मिली ऐ। वेनेजुएला दे राष्ट्रपति होरें पूरे मुलखे च 7एं दिनें लेई राष्ट्रीय सौग दी घोशणा कीती ऐ कि जे इस 24 जून गी आने आले भूंचाल कन्नै तकरीबन ढाई ज्हार लोकें जान मुहाई ऐ। 12 ज्हार थमां बी मते लोक जखमी होए न ते 189 ईमारतां तबाह होई गेइयां न।

<><><><><><>

PM-Rai Guj.

प्रधानमंत्री नरेंद्र मोदी होर कल राजस्थान ते गुजरात दा दौरा करंगन। अपने दौरे दरान श्री मोदी होर जोधपुर ब्हाई अड्डे पर न्यू टर्मिनल बिल्डिंग दा उद्घाटन करंगन। एह प्रोजेक्ट जेदे पर 480 करोड़ रपे दा खर्च होए दा ऐ, एहदे कन्नै सलाना 20 लक्ख जात्रिएं गी साम्भने दे स्थावे नै डिजाइन कीता गेदा ऐ। मोदी होर जोधपुर च संशोधित यू.डी.ए.ओ.आई. स्कीम गी बी लांच करंगन। इस स्कीम दा मकसद विमानन सरबन्धी विकास गी बधाइयै अगले चरण तगर पजाना ऐ। मीं होर अपने दौरे दरान राजस्थान दे बलोतरा च केई सारे विकसित प्रोजेक्टें दा नींह पत्थर रक्खंगन ते उद्घाटन करंगन जिंदे पर तकरीबन इक्क लक्ख 6 ज्हार करोड़ रपे दा खर्चा औग। एह प्रोजेक्ट बक्ख-बक्ख खेत्तरें कन्नै सरबन्ध रखदे न जिंआं रेलवे, शिडकां, अक्षय उर्जा। एहदे मगरा प्रधानमंत्री होर गुजरात दा दौरा करंगन जित्थे ओहू सेमी आउटसोरूड सेमीकंडक्टर असेंबली एंड टेस्ट फेसिलिटी दा उद्घाटन करंगन।

<><><><><><>

Ukraine Killings

यूक्रेन दी राजधानी कीव च रूस आसेआ कीते गेदे ड्रोन ते मिसाईल हमलें च 27 लोकें दी मौत होई गेई ऐ ते 90 होर जने जखमी बी होए न। इ'नें हमलें दरान कीव च, मुख तौर उप्पर रिहायशी इमारतें ते सार्वजनिक ढांचे सने 30एं थाहें पर बड़ा मता नुक्सान होने दी जानकारी ऐ। रूस दे रक्षा मंत्रालय ने इक बयान च आखेआ ऐ जे यूक्रेन आसेआ ओहदे नागरिक ढांचें पर हमला कीते जाने दे परते च रूस ने बुधवारें रातीं एह हमले कीते न। यूक्रेन दे राष्ट्रपति वोलोदीमीर ज़ेलेंस्की होरें आखेआ ऐ जे उ'नें रूस च मुख तौर उप्पर तेल रिफाईनरिएं गी निशाना बनाया ऐ जेहदे चलदे रूस च ईंधन संकट पैदा होई गेआ ऐ। ध्यानजोग ऐ जे रूस ते यूक्रेन बश्कार पिच्छले 4 ब'रें थमां जंग चला करदी ऐ।

<><><><><><>

Pak. Accident

पाकिस्तान च अज्ज शेरानी-ज़ोब जरनैली सिडकै पर होए दे हादसे च घटोघट्ट 40 लोकें दी मौत होई गेई ते 8 होर जने जख्मीं होई गे। एहू हादसा बलोचिस्तान ते खैबर पख्तूनख्वा दे बन्ने दे नेडे दानासर इलाके च उसलै होआ जिसलै इक जात्तरी बस सिडकै थमां रूलकियै हेठ जाई डिग्गी। मेडिकल एमरजेन्सी प्रतिक्रिया केन्द्र मूजब, हादसे आहली थाहै थमां 40 लोकें दे शव बरामद करी लैते गेदे ना जख्मिएं गी इलाज लेई अस्पताल च भर्ती करोआई दित्ता गेआ ऐ।

<><><><><><>

IMD-Weather

भारती मौसम विभाग नै किश राज्यें च कल धोड़ी तेज बरखा पौने करी रेड अलर्ट जारी कीता ऐ। इनें राज्यें च गुजरात, कोंणना, गोवा, मध्य महाराष्ट्र, उड़ीसा ते मध्य प्रदेश दे पच्छिमी इलाके शामिल ना विभाग नै छत्तीसगढ़, पूर्वी मध्य प्रदेश, उत्तर प्रदेश ते विदर्भ च बी गरज-चमक होने दी पेशनगोई कीती ऐ। एहूदे कन्नै यू.पी, बिहार, आंध्र प्रदेश, पच्छिम बंगाल ते गंगा कन्नै लगदे इलाके, कर्नाटक, जम्मू-कश्मीर, लद्दाख, तमिलनाडू, पुदुचेरी, कराईकल, तेलंगान ते मुल्खै दे उत्तर पूर्वी राज्यें ते केंद्र शासित प्रदेशें च कल धोड़ी भारी बरखा होने दी मेद ऐ। छत्तीसगढ़, कर्नाटक दा समुंद्री इलाका, पूर्वी मध्य प्रदेश, राजस्थान दे पूर्वी इलाके, हिमाचल प्रदेश, केरल, माहे, उत्तराखंड ते विदर्भ च बी इयो जनेह हालात बने दे रौहंगन ते दिल्ली, हरियाणा, पंजाब, चंडीगढ़, राजस्थान, अंडमान, निकोबार, गुजरात ते झारखंड च बी कल धोड़ी मौसम बदलोखड़ा ते अंधी झक्खड़ पौने दे असार दस्से गेदे ना।

<><><><><><>

FIFA World Cup

ते फीफा विश्व कप च स्विटजरलैंड नै अल्जीरिया गी 2-0 कन्नै हराइयै राउंड आफ 16 च अपनी थाहर बनाई लेई। कनेडा दे वैंकूवर च स्विटजरलैंड दा मुकाबला मंगलवार गी उसै थाहर पर कोलंबिया या

घाना च कुसै इक्क कन्नै होग जेदा मकसद अपने इतिहास च चौथी बार क्वार्टर फाइनल च पुज्जना होग।
इक होर मैच च स्पेन नै कैलिफोर्निया दे इंगलवुड स्थित लास एंजलस स्टेडियम च राउंड आफ 32 च
आस्ट्रेलिया गी 3-0 कन्नै हराइयै राउंड आफ 16 च अपनी थाहर पक्की करी लैती।

<><><><><><>

Drone-Drugs

भारत पाकिस्तान बन्ने पर ड्रोन राहें नशीले पदार्थे दी तस्करी केंद्र शासित प्रदेश जम्मू-कश्मीर सने
पंजाब ते राजस्थान लेई बी इक बड्डे ते तेजिआ कन्नै बधदे खतरे दे तौरा पर सामने आई ऐ।
नार्कोटिक्स कंट्रोल ब्यूरो-एन.सी.बी दी 2025 आली रिपोर्ट मूजब पिछले 5एं बरें दरान नेहू मामलें
च तेजिआ कन्ने बाद्दा दर्ज कीता गेआ ऐ। रिपोर्ट मताबक, 2025 दरान भारत-पाकिस्तान बन्ने पर
ड्रोन राहें नशा तस्करी दे 305 मामले दर्ज कीते न जिंदे नतीजतन 468 किलोग्राम नशीले पदार्थ जब्त
कीते गे जेहडे 2024 दी जब्ती दे मुकाबले च 98 फीसद मते न। एनसीबी दी रिपोर्ट मताबक ड्रोन राहें
नश तस्करी दे सब्भनें शा मते मामले पंजाब थमां सामने आए न जिसले के जम्मू-कश्मीर इस मामले
च दुए नम्बरै पर ऐ ते इत्थे 5 किलो 811 ग्राम हेरोइन ते 447 ग्राम अफीम जब्त कीती गई ऐ।

<><><><><><>

Maharashtra-Rainfall

महाराष्ट्र दे केई सारे हिस्सें च अज्ज भारी बरखा जारी रेई। मुंबई च अज्ज उप्परोतली चैथे ध्याड़े बी
बरखा बरी ऐ। भारती मौसम विभाग ने अगले 3 दिनें दरान मुंबई लेई बरखा ते खराब मौसम दी
आर्रेज अलर्ट आहली चेतावनी जारी कीती दी ऐ। पिच्छले 24एं घैंटे दरान मुंबई शैह्ला दे हिस्सें च
150 मिलीमीटर बरखा दर्ज कीती गई ऐ। बृहन-मुंबई नगर निगम ने अपनी एमरजेन्सी टीमें गी अलर्ट
पर रक्खे दा ऐ। लगातार बरखा दे चलदे मुंबई दे हेठले इलाकें च केई थाहें पर पानी भरोची जाने दी
बी जानकारी थ्होई ऐ। बरखा करी केन्द्री ते हार्बर रेलवे दिआं सेवां बी 10 शा 15 मिंटे चिरें चलियां
न। उ'आं वेस्टर्न रेलवे दिआं सेवां आम ध्याड़े आह्ला लेखा जारी न। कोंकण खित्ते च बी भारी बरखा

बरोबर जारी ऐ। रत्नागिरी जिले च पिच्छले 24एं घैंटे दे दरान 69 मिलीमीटर बरखा दर्ज कीती गई। बड्डे दरेआएं च पानी दा स्तर बधी गेदा ऐ ते रत्नागिरी जिले च दरेया 5 मीटर दे चेतावनी आहले स्तर दे नेडे पुज्जी गेदा ऐ। अधिकारिएं हालात उप्पर लगातार निगरानी रक्खी दी ऐ। तोआई बरसांती दी रूतै दरान एहतियात दे तौर उप्पर एनडीआरएफ दी 5 बटालियन ने महाराष्ट्र ते गोवा च संवेदनशील ते खतरे दी शेंका आहले जिलें च अपनी बचाऽ टीमें दी तैनाती कीती ऐ।

<><><><><><>